

Kadar pengangguran suku pertama menurun

Kadar pengangguran turun pada 3.3 peratus pada suku pertama 2024 dengan bilangan penganggur terus menurun kepada 561,100 orang, menurut Sorotan Pasaran Buruh Suku Pertama 2024 dikeluarkan Jabatan Perangkaan Malaysia (DOSM), semalam.

Ketua Perangkawan, Datuk Seri Dr Mohd Uzir Mahidin, berkata guna tenaga berkembang pada tiga bulan pertama 2024 kepada 16.40 juta orang berikutan permintaan yang berterusan terhadap buruh.

Beliau berkata, pertumbuhan eksport positif berikutan permintaan luaran yang lebih tinggi, serta permintaan domestik yang berdaya tahan, menyumbang kepada prestasi ekonomi yang lebih baik dengan kadar pertumbuhan lebih tinggi sebanyak 4.2 peratus berbanding 2.9 peratus pada suku sebelumnya.

Selain itu, katanya, peningkatan dalam keadaan pasaran buruh dan aktiviti pelaburan yang kukuh turut memainkan peranan penting dalam mengukuhkan permintaan buruh.

“Selari dengan perkembangan ekonomi yang berterusan, penawaran buruh bertambah baik apabila kadar penyertaan tenaga buruh meningkat 0.4 mata peratus tahun ke tahun kepada 70.2 peratus.

“Bilangan tenaga buruh meningkat 1.9 peratus untuk merekodkan 16.96 juta orang, terutama disumbangkan oleh kenaikan 2.1 peratus penduduk bekerja, yang merangkumi 16.40 juta orang,” katanya dalam satu kenyataan, semalam.

Mengulas lanjut, Mohd Uzir berkata, keadaan pasaran buruh Malaysia berkembang pada suku pertama ini berikutan peningkatan dalam permintaan dan penawaran.